

**PEMBERITAHUAN PERTANYAAN**

**DEWAN RAKYAT, MALAYSIA**

**DARIPADA** : Y.B. TUAN NGA KOR MING  
(TAIPING)

**PERTANYAAN** : LISAN

**TARIKH** : 16.03.2017

**Y.B. TUAN NGA KOR MING [ TAIPING ]** minta **MENTERI KEWANGAN** menyatakan apakah tindakan dan rancangan Kerajaan untuk memulihkan mata wang Ringgit yang nilainya telah merosot secara ketara sehingga ia menjadi mata wang yang mengalami kejatuhan paling teruk di Asia sejak 2014.

**JAWAPAN**

Tuan Yang di-Pertua,

1. Penyusutan nilai mata wang bukanlah unik kepada Malaysia sahaja. Keadaan ini turut dialami oleh mata wang serantau yang mencerminkan terutamanya pengukuhan dolar AS. Pada tahun 2016, nilai ringgit telah menyusut sebanyak 4.3%

berbanding dolar AS. Penyusutan nilai ringgit kebanyakannya didorong oleh perubahan aliran dana yang didorong oleh faktor luaran.

2. Faktor-faktor tersebut termasuklah jangkaan bahawa kadar faedah akan meningkat, kenaikan kadar dasar *Federal Reserve* AS, ketidaktentuan dalam harga minyak mentah dunia, dan kebimbangan terhadap kadar pertumbuhan ekonomi dan ketidaktentuan pasaran kewangan di China. Ketidaktentuan politik di UK, kawasan Euro dan AS, juga menjejaskan permintaan terhadap aset dalam pasaran sedang pesat membangun, yang telah memberi kesan negatif terhadap kebanyakan matawang negara-negara sedang pesat membangun dan serantau, termasuk ringgit.

Tuan Yang di-Pertua,

3. Dalam menangani penyusutan nilai ringgit dalam jangka masa pendek, Kerajaan akan sentiasa memastikan pasaran pertukaran matawang asing tidak terjejas bagi memastikan kegiatan ekonomi berjalan dengan lancar. Pada masa yang sama, kedudukan rezab Bank Negara Malaysia (BNM) berjumlah USD95 bilion akan terus menjadi penampan kepada

turun naik yang berlebihan dalam pasaran kewangan.

4. Pada hujung tahun 2016, BNM juga telah memperkukuh semula peraturan sedia ada untuk menghalang penglibatan insitisi kewangan berlesen dalam negara dalam aktiviti kontrak hadapan tanpa serahan (*non-deliverable forward*, NDF). Langkah ini bertujuan untuk membendung aktiviti spekulatif kontrak hadapan tanpa serahan (NDF) dalam pasaran luar persisir yang telah memberikan kesan negatif terhadap pasaran pertukaran asing dalam negara. Pada masa yang sama, BNM akan terus menyediakan mudah tunai di pasaran tempatan bagi memastikan keadaan pasaran yang stabil dan teratur.

5. Walaupun negara kita merupakan pengeksport bersih dan mencatatkan lebih akaun semasa dalam imbalan pembayaran, perolehan eksport dalam matawang asing tidak ditukar kepada ringgit, lalu menyebabkan ketidakseimbangan di dalam permintaan dan penawaran ringgit di pasaran pertukaran asing. Bagi membendung masalah ini, Jawatankuasa Pasaran Kewangan, bersama BNM, juga telah mengambil langkah-langkah untuk menggalakkan pasaran perlindungan nilai dan mengatasi ketidakseimbangan dalam

pasaran pertukaran asing dalam negeri. Ini termasuk mewajibkan penukaran hasil eksport dalam mata wang asing ke ringgit, untuk menangani ketidakseimbangan ini. Aliran perolehan eksport mata wang asing ke dalam pasaran kita akan meningkatkan mudah tunai mata wang asing dalam pasaran dalam negeri.

6. Walaupun hanya dua bulan sejak pengumuman langkah-langkah ini, terdapat tanda-tanda yang menunjukkan hasil yang megalakkan. Perkara yang paling utama ialah turun naik nilai ringgit telah menunjukkan kestabilan yang ketara sejak langkah-langkah ini mula beroperasi.

7. BNM, dari semasa ke semasa, akan memperkenalkan langkah-langkah liberalisasi baru yang bertujuan untuk mengembangkan pasaran pertukaran wang asing, bon, dan wang dalam negara untuk memenuhi permintaan peserta pasaran dan membolehkan perniagaan tempatan untuk mengurus dedahan kadar pertukaran di dalam negara.

8. Dalam jangka yang lebih panjang, nilai ringgit akan didorong terutamanya oleh kekuatan asas ekonomi negara. Dalam hal ini, usaha Kerajaan untuk melaksanakan program transformasi

ekonomi termasuk mempelbagaikan sumber pertumbuhan, pembaharuan fiskal dan langkah untuk memastikan sistem kewangan yang kukuh dan stabil akan dapat memberi sokongan ke arah pengukuhan nilai ringgit.

Tuan Yang di-Pertua,

9. Apabila nilai ringgit menyusut, sebahagian sektor ekonomi akan menerima manfaat manakala terdapat juga sebahagian sektor ekonomi yang akan terjejas. Pengeksport akan menerima manfaat dari segi hasil eksport yang lebih tinggi dalam nilai ringgit atau peningkatan dalam permintaan bagi barangan buatan Malaysia. Secara khususnya, penyusutan nilai ringgit akan memberi manfaat kepada eksport perkilangan Malaysia yang menyumbang sebanyak dua pertiga daripada jumlah eksport kasar.
10. Penyusutan nilai ringgit akan menyebabkan kenaikan kos import. Walau bagaimanapun, kesannya terhadap kadar inflasi diimbangi oleh sumbangan sederhana wajaran barangan import daripada keseluruhan permintaan domestik. Sebagai contoh, bahan mentah dan bahan pengantara yang diimport hanya mencakupi sekitar 20% daripada jumlah pengeluaran.

Barangan import (tidak termasuk petrol dan diesel) hanya mencakupi 6.4% daripada kumpulan Indeks Harga Pengguna (IHP). Keadaan permintaan dalam negeri yang lebih sederhana juga akan membendung tekanan inflasi, memandangkan kesanggupan dan keupayaan firma untuk memindahkan sepenuhnya tekanan kos yang lebih tinggi kepada pengguna dijangkakan lebih terhad.

11. Untuk menangani kenaikan kos sara hidup, pihak Kerajaan akan terus mengambil langkah-langkah bagi mengatasi masalah kekurangan bekalan dan mengurangkan kebergantungan terhadap import bagi barangan asas, dengan menaikkan jumlah pengeluaran domestik bagi barangan keperluan.

12. Selain itu juga, dalam menangani cabaran semasa, Kerajaan akan sentiasa memastikan pasaran pertukaran mata wang asing tidak terjejas bagi memastikan kegiatan ekonomi kekal mapan.